

दिनांक 03.06.2025  
समय: 18.45 बजे  
आकाशवाणी जयपुर-अजमेर  
प्रादेशिक समाचार

- वंदे गंगा जल संरक्षण-जन अभियान की प्रदेश मांय जोरदार तैयारियां-पांच जून ऊं सरू व्हेवण वाळी ई मुहिम मांय पाणी की बचत कर र भेळो करण रो संदेश दियो जावेला।
- कृषि मंत्री किरोड़ी लाल मीणा की अगुवाई मांय श्रीगंगानगर मांय अहलकार बीज भंडारां की जांच कर र मोटी तादाद मांय नकली अर अवधिपार बीज ज़ब्त कीना।
- रक्षा राज्यमंत्री संजय सेठ एनसीसी मांय 3 लाख कैडेट्स जोड़बा रो ऐलाण कीनो।
- अंतर्राष्ट्रीय योग दिवस रा काउंट डाउन कार्यक्रम जारी-प्रदेशभर मांय सामूहिक योगाभ्यास रा आयोजन।

-----

वंदे गंगा जल संरक्षण जन अभियान की ज़रूरी तैयारियां करी जा रही हैं। पांच जून ने विश्व पर्यावरण दिवस ऊं सरू व्हेवण वाळा ई अभियान की जाणकारी जनता तांई पूगायी जावेला। ई अभियान रे जरिये पाणी की बचत अर इण ने भेळो करण रो संदेश दियो जावेला। जैसलमेर मांय ई अभियान की तैयारियां रो जायजो लेवण सारू आज अहलकारां की मीटिंग राख्यी ज्यी। जिला परिषद् रा मुख्य कार्यकारी अधिकारी अहलकारां ने अभियान रे दौरान पौधा रोपण अर साफ सफाई रा काम करावण रा हुकम दीना। पाली रा जिला कलेक्टर वंदे गंगा जल संरक्षण जन अभियान ऊं लोगां ने जोड़बा रा मकसद ऊं एक गीत जारी कीनो।

-----

देश मांय चलाया जा रहया विकसित कृषि संकल्प अभियान रा तहत किसानां ने साखां की बेहतर किस्मां अर तकनीक रा बारा मांय जाणकारी दी जा रही है। इण रा तैत किसानां ने मिट्टी मांय पोषक तत्वां रा महत्त्व, बिरखा रो पाणी भेळो करण अर खेती-किसानी मांय कर्या जा रहया नुवा कामां की ई जाणकारी दी जा रही है। ई सागे ई ड्रोन रे मार्फत कीड़ा मारण की दवाइयां रा छिड़काव रो दरसाव कर्यो जा रहयो है। डीग जिला मांय अभियान की नोडल अधिकारी डॉ. प्रियंका जोशी बतायो के किसानां ने खेती-बाड़ी अर बागवानी ऊं जुड़ी योजनावां रा तैत दी जावण वाळी सब्सिडी रा बारा मांय ई जाणकारी दी जा रही है। आं सत्रां मांय सिरकत करण वाळा किसान कह्यो के आं सत्रां मांय जाणकारां रे मार्फत वां की शंकावां ई दूर करी जा रही है।

-----

कृषि मंत्री किरोड़ी लाल मीणा की अगुवाई मांय अहलकार श्रीगंगानगर मांय बीज भंडारां की औचक जांच कीनी। ई दौरान मोटी तादाद मांय नकली अर अवधि पार बीज ज़ब्त करी ज्यो। खबरनवीसां सागे बातचीत करता थकां कृषि मंत्री कह्यो के सरूआती जांच मांय केई गड़बड़ियां मिली है। वे बतायो के केई बीज भंडारां रे बिना लाइसेंस चालण की ठा पड़ी है।

-----

कृषि विभाग, प्रशासन अर हिफाजती दस्तां री ओर ऊं मिल र करी ज्यी ई कार्रवाई रे दौरान मौका ऊं बीजां रा नमूना ई ले र जांच सारू भेजी ज्या।

-----

विश्व खाद्य सुरक्षा दिवस रा सिलसिला मांय आज प्रदेश मांय खाण-पीण री पौष्टिक सामग्री मुहैया करावण री मुहिम सारू करी ज्यी। पांच दिन रा ई अभियान रा तहत खाण-पीण रा सामान रा नमूना लिया जावेला। ई रा तैत आज जैसलमेर मांय अन्नपूर्णा रसोइयां री जांच करी ज्यी। सीएमएचओ डॉ. राजेन्द्र कुमार पालीवाल बतायो के ई दौरान आं रसोइयां ऊं खाण-पीण री सामग्री रा नमूना ले र जांच सारू जोधपुर भेजी ज्या।

-----

केंद्र सरकार नागौरी पान मेथी ने मसाला बोर्ड री लिस्ट मांय शामिल कर लीनी है। ई पाछे मसाला बोर्ड री लिस्ट मांय अब 53 भांत रा मसाला शामिल क्हे गया है। इण ऊं नागौरी मेथी री दिसावर मांय बिक्री बधेला जिण ऊं मेथी री उपज लेवण वाळा किसानां ने ई फायदो मिलेला।

-----

राजस्थान पुलिस री खुफिया शाखा जैसलमेर ऊं शकूर खान नाम रा एक जणा ने पाकिस्तान सारू जासूसी करण रा आरोप मांय गिरफ्तार करी ज्यो है। ओ लोग हाल ताई जैसलमेर रा रोजगार दफ्तर मांय सहायक प्रशासनिक अधिकारी रा तौर ऊं काम कर रह्यो हो। वां माथे खुफिया जाणकारियां पाकिस्तान ने देवण रो आरोप है। खुफिया विभाग रा पुलिस महानिरीक्षक विष्णुकांत गुप्ता बतायो के आरोपित रा काम माथे लम्बा बगत ऊं शंका ही अर हिफाजती एजेंसियां री ओर ऊं करड़ी निज़र राख्यी जा रही ही। वां माथे पाकिस्तान रा दूतावास मांय काम करण वाळां अर आईएसआई रा एजेंटों सागे लगातार सम्पर्क मांय रेहवण री शंका है। पुलिस रे मुजब वां रे केई दफ़ा पाकिस्तान जावण री ई जाणकारी मिली है।

-----

राष्ट्रीय मानवाधिकार आयोग रा महानिदेशक आर.पी. मीणा आज जयपुर मांय राज्यपाल हरिभाऊ बागडे सागे मुलाकात कीनी। राजभवन मांय व्ही ई मुलाकात रे दौरान श्री मीणा राज्यपाल ने आयोग रा काम-काज री जाणकारी दीनी।

-----

रक्षा राज्यमंत्री संजय सेठ देशभर मांय 3 लाख राष्ट्रीय कैडेट कोर कैडेट्स जोड़बा रो ऐलाण कीनो है। वे आज भोपाल मांय एनसीसी रा सम्मेलन मांय बोल रह्या हा। श्री सेठ कह्यो के ई सारू केई राज्य पैली ई सहमति दे दीनी है अर सिखावण सारू जरूरी बुनियादी ढांचो बणावण बाबत् तेज़ी ऊं काम कर रह्या है। वे कह्यो के देश बणावण अर नौजवानां रा विकास मांय एनसीसी रो मोटो काम है। रक्षा राज्यमंत्री स्वच्छ भारत अभियान, नया सवेरा योजना अर नशा मुक्ति अभियान मांय एनसीसी री भागीदारी री ई सराहणा कीनी।

-----

अंतर्राष्ट्रीय योग दिवस करीब आवण सागे ई राज्य मांय न्यारी-न्यारी ठौड़ां भांत-भांत रा कार्यक्रम राख्यो जा रह्या है। पाली मांय जनता मांय योग सारू जाग जगावण रा मकसद ऊं ज़िला अर उपखंड स्तर सागे ई आयुष्मान आरोग्य मंदिरां मांय ई योगाभ्यास करवायो जा रह्यो है। भरतपुर

मांय ई लगातार योगाभ्यास करवायो जा रह्यो है अर न्यारी-न्यारी संस्थवां रे मार्फत योग ऊं जुड़बा री अपील करी जा रही है। चूरू मांय ई न्यारी-न्यारी ठौड़ां लगाया जा रह्या योग शिविरां मांय लोग उमाव सागे सिरकत कर रह्या है।

-----

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलाई जा रही है। इण रे मार्फत योग ने रोजीना री ज़िन्दगी मांय योग ने अपनावण री प्रेरणा दी जा रही है। आज पेश है जयपुर रा योग गुरु अभिषेक सोती रो संदेश। वां रो केहवणो है के योग कसरत नहीं बल्कि जीवण रो तरीको है।

-----

भ्रष्टाचार निरोधक ब्यूरो री टीम जोधपुर डिस्कॉम रा एक हेल्पर ने 25 हजार रुपया री घूस लेता थकां गिरफ्तार कीनो है। आरोपित कर्मचारी नांदड़ी रा ए.ई.एन ऑफिस मांय लाग्योड़ो है। एसीबी रा महानिदेशक डॉ. रवि प्रकाश मेहरड़ा बतायो के आरोपित परिवारी ऊं बिजली कनेक्शन रो लोड कम करण री एवज़ मांय आ रकम मांगी ही।

-----

बाड़मेर ज़िला मांय चौहटन कने बूठ राठौड़ान मांय आज ट्रक अर पिकअप री टक्कर रे कारण दो जणां री मौत व्हे गयी अर 6 जणा जख्मी व्हे ग्या। एक जणा री मौके ई मौत व्हे गयी जद के दूजो अस्पताल ले जाती बगत गेला मांय दम तोड़ दीनो।

-----

आईपीएल क्रिकेट होड़ रा फाइनल मुकाबला मांय आज अहमदाबाद रा नरेंद्र मोदी स्टेडियम मांय रॉयल चैलेंजर्स बेंगलुरु अर पंजाब किंग्स री टीमां आमी-सामी व्हेला। दोन्यू टीमां वां रो पहलो आईपीएल खिताब जीतण सारू मैदान मांय उतरेला। मैच अब ऊं थोड़ी देर पछे साढ़े सात बज्यां सरू व्हेला।

-----

प्रदेश मांय आज ई केई ठौड़ां आंधी चाली अर बारिश व्ही। झालावाड़, चूरू, हनुमानगढ़ अर श्रीगंगानगर समेत केई ठौड़ां बिरखा व्ही। सूरतगढ़ रा राजियासर हलका मांय ओळा पड़्या। श्रीगंगानगर मांय तेज़ गरज़ सागे बिरखा व्हेवण रे दौरान दिन मांय ई अंधारो व्हे ग्यो। मौसम विभाग रे मुजब लारला 24 घंटां मांय झालरापाटन अर रामगंजमंडी मांय 8-8 सेंटीमीटर पाणी बरस्यो। जयपुर, जोधपुर, बीकानेर, भरतपुर अर कोटा संभाग मांय काल हल्की ऊं मझला दर्जा री बिरखा रा आसार है, जद के उदयपुर अर जोधपुर संभाग मांय कठे-कठे तेज अंधड़ सागे बिरखा व्हेवण री संभावना है। मौसम महकमा रे मुजब पांच जून ताई ऐड़ो ई मौसम रहवण रा आसार है, जद के 6 जून ऊं तापमान मांय 3 ऊं 5 डिग्री सेल्सियस ताई री बधोतरी री संभावना है।

-----